



CENTRALE BANK VAN ARUBA

Banco Central di Aruba a hisa e tasa di reserva obligatorio cu dos punto di porcentahe desde 1 di april 2022, pa reduci e nivel di likides excesivo na e banconan comercial.

Comunicado di prensa

Durante e reunion di 16 di maart 2022, e Comite di Maneho Monetario (CMM)¹ di Banco Central di Aruba (BCA) a dicidi pa hisa e tasa di reserva obligatorio² di 16,0 porciento pa 18,0 porciento entrante 1 di april 2022. E decision aki ta basa primordialmente riba e nivel halto di likides excesivo na e banconan comercial, ademas di un subida den presion inflacionario, incluyendo e efecto modesto riba e nivel di likides excesivo cu a resulta for di e subida anterior den e tasa di reserva obligatorio.

CMM a considera e siguiente informacion y analisis pa yega na e decision aki:

Reservanan internacional

Reservanan internacional, cu ta consisti di reservanan oficial y reservanan teni pa banconan comercial, a contrae cu Afl. 6,0 million (Grafico 1). Similarmente, e reservanan oficial per 25 di februari 2022, (incluyendo e diferencia di revaluacion di oro y reserva di divisa) a baha cu Afl. 5,5 miyon compara cu fin di december 2021. Consecuentemente, riba 25 di februari 2022, e reservanan oficial y internacional a suma te na Afl. 2.739,4 miyon y Afl. 3.123,6, miyon respectivamente. Pa e resto di 2022, ta premira subidanan den reservanan oficial y internacional como resultado di entradanan relata na turismo, fiansanan di exterior, y den inversion procedente di exterior.

Ta anticipa cu e reservanan internacional den 2022 lo keda riba e cantidad minimo di 3 luna rekeri di e cuenta coriente di e balansa di pago (incluyendo petroleo). Reservanan oficial ta premira di keda dentro di e metrico di ARA³ di IMF (Tabel 1).

¹ E CMM a ser institui na mei 2010 pa periodicamente evalua y determina e maneho monetario di BCA. Adicionalmente, CMM ta aspira pa mehora e transparencia di maneho monetario.

² E tasa di e reserva rekeri ta e cantidad minimo di reserva cu banconan comercial mester mantene na BCA y ta (actualmente) igual na 18,0 porciento di nan obligacionnan cu ta vence den menos di 2 aña.

³ E metrico di IMF ARA ta referi na "Assessing Reserve Adequacy Metric" di Fondo Monetario Internacional cual ta midi con adecua e reservanan oficial ta door di compara esaki cu un averahe a base di peso di placa den circulacion, fiansa entre companianan liga na otro, debe riba termino cortico y termino largo, y exportacion di bienes y servicio.




Grafico 1 – Desaroyo den reserbanan oficial y internaciol.

Tabel 1: Metriconan relata na reserbanan observa den 2022

	jan	feb ³
Cobertura di pagonan riba cuenta coriente ¹	8,6	8,1
Metrico di IMF ARA ²	107,6	106,9

¹ Den cantidad di luna

² Den porciento

³ Riba 25 di februari, 2022

Inflacion

Na januari 2022, e Indice di Prijs di Consumo (CPI) tabata 3,3 porciento mas halto compara cu e mesun luna di e aña anterior (Grafico 2). E subida den CPI compara cu e aña anterior tabata causa primordialmente door di crecimiento den prijs di gasoline cu a afecta e componente di ‘transporte’ (contribuyendo cu 1,5 punto di porcentahe). E aumento den CPI aki ta debi na prijsnan mas halto den ‘cuminda y bebidanan no-alcoholico’ (contribuyendo cu 0,5 punto di porcentahe), ‘pañá y sapateria’, ‘vivienda’, y ‘operacion di vivienda’ (tur contribuyendo cu 0,3 punto di porcentahe). E inflacion midi

riba promedio di 12 luna a subi te na 1,2 por ciento y ta premira di sigui crece den 2022. E premiracion aki ta basa riba subida den nivel di prijs particularmente na Merca y Europa, cu ta e resultado di (1) e guerra na Ukraina, (2), e “lockdown” (parcial) na algun ciudad na China, y (3) problemanan logistico cu ta afectando produccion y cadena di suministro.

Grafico 2. Inflacion basa riba Prijs di Consumo di Aruba
(Fuente: CBS, januari 2022)




Grafico 2 – Inflacion

Likides di banconan comercial

E total di likides excesivo na e banconan comercial a baha di Afl. 1.320,5 miyon na december 2021 na Afl. 1.270,9 miyon na januari 2022 (Grafico 3). E caida aki ta debi primordialmente na e subida di un punto di porcentahe den e tasa di reserva obligatorio riba 1 di januari 2022, cu a extrae Afl. 48,1 miyon di likides excesivo. No obstante, e nivel di likides excesivo ta permanece significantemente riba e nivel midi prome cu e pandemia. E nivel amplio di likides excesivo na e banconan comercial ta parcialmente causa pa e falta continuo di demanda pa credito, banda di e nivel eleva di fondonan di likides⁴ na e banconan comercial.

⁴ E total di fondonan di likidez di banconan comercial ta consisti di e siguiente componentenan: ‘cash’, cuentanan coriente y depositonan riba termino largo teni na BCA, cuentanan coriente y depositonan riba termino largo di otro banconan comercial, ‘short-term securities’, bononan di gobierno, y otro ‘marketable securities’.

Grafico 3: Likides excesivo di banconan comercial den miyon di florin
(Fuente: CBA)




Grafico 3 – Desaroyo den likides excesivo

Desaroyonan den credito

Durante januari 2022, credito total di e banconan comercial a baha cu Afl. 16,5 miyon of 0,4 por ciento te na Afl. 3.808,4 miyon, compara cu december di 2021. E caida aki tabata debi na e categoria ‘credito na empresa’ (Afl. 11,9 miyon/0,8 por ciento), cual a resulta pa un gran parti na un bahada den prestamo riba cuenta corriente (Afl. 5,4 miyon) y fianza cu termino di mas largo di 2 aña (Afl. 4,0 miyon). Tambe, menos ‘credito na individuo’ (Afl. 5,0 miyon/0,3 por ciento) a contribui na un nivel generalmente mas abou di credito. Particularmente, su sub-componente ‘credito na consumidor’ a mengua cu Afl. 4,9 miyon. Pa e resto di 2022, credito bancario total ta premira di keda flat.

Desaryoyo den deposito di banconan comercial

Na januari 2022, e total di depositonan teni pa residente a yega na un nivel eleva di Afl. 5.132,3 miyon, aunke cu depositonan mara na cierto termino a cay cu Afl. 38,0 miyon compara cu December 2021. Ademá, mientras cuentanan di spaar a baha cu Afl. 1,9 miyon, deposito teni riba cuenta corriente a subi cu Afl. 3,7 miyon.

Banco Central di Aruba

16 juni 2022